



**Dr Malina Osman**

## Lalai patuh SOP boleh cetus gelombang baharu

**Kuala Lumpur:** Kelalaian masyarakat mematuhi prosedur operasi standard (SOP) berupa ya mencetuskan gelombang baharu penularan jangkitan COVID-19, khususnya membabitkan golongan berisiko.

Warga emas, kanak-kanak dan individu yang mempunyai sejarah penyakit tidak berjangkit (NCD) dikhawatiri bakal menjadi mangsa keadaan selepas rakyat Malaysia sejak kebelakangan ini dilihat semakin memandang enteng pematuhan SOP.

Pakar epidemiologi dari Universiti Putra Malaysia (UPM), Prof Madya Dr Malina Osman, ketika mengemukakan pendirian itu berkata, situasi sedemikian tercetus di beberapa negara termasuk Australia dan Kazakhstan.

Sehubungan itu, katanya, prestasi Malaysia mencatat sifar kes penularan tempatan untuk dua hari berturut-turut tidak sewajarnya dijadikan ‘tiket’ oleh penduduk di negara ini memandang rendah kepada bahaya COVID-19.

“Pengamatan saya juga mendapati penjarakan fizikal nampaknya tidak dijaga dalam kalangan masyarakat, sekali gus meningkatkan risiko penularan sehingga berupaya mengundang gelombang baharu jangkitan.

“Walaupun ada tanggapan mengatakan wabak COVID-19 tidak ‘seganas’ seperti ketika menular pada Februari, Mac dan April lalu, kita jangan jadikannya sifar mudah.

“Sekiranya tiada pematuhan SOP di tempat awam, maka potensi penularan jangkitan, khususnya membabitkan golongan berisiko sentiasa ada,” katanya ketika dihubungi BH, semalam.

Pakar virologi dari Universiti Malaya (UM), Prof Dr Sazaly Abu Bakar, berkata kejayaan Malaysia meratakan lengkungan jangkitan COVID-19 berpunca daripada pelaksanaan Perintah Kawalan Pergerakan (PKP).

Katanya, pendekatan sejak 18 Mac lalu sehingga menyaksikan masyarakat ‘terkurung’ di rumah masing-masing itu mungkin sia-sia sekiranya kepentingan mematuhi SOP terus diabaikan.

“Selain tidak disokong dengan fakta dan data, tanggapan bahwa virus COVID-19 kini lemah, bukan seperti ia baru muncul dahulu adalah meleset sama sekali,” katanya.